

Čelni ljudi katarske grupacije metalske industrije Hamdo izrazili su zainteresiranost za izgradnju nove energane na naftni pogon za proizvodnju električne energije u Hercegovini. Predstavnici ove velike katarske grupacije, u Bosni i Hercegovini traže najpoželjnije načine za ulaganje, te su, uz posredovanje Agencije za promociju stranih ulaganja u BiH, odnosno njenog područnog predstavnika za Hercegovinu Amira Kazića, boravili i u posjetu Aluminiju, u kojem ih je ugostio direktor Društva Mario Gadžić, sa suradnicima.

- Tvrtka poput Hamdoa dobro je došao partner u smislu razmatranja moguće partnerske saradnje u otvaranju novoga prerađivačkog pogona u blizini Aluminija ili, pak, kupovine neke manje linije za proizvodnju gotovih proizvoda ili poluproizvoda, namjenski za određenu granu koja bi brzo opravdala, odnosno pokazala isplativost ulaganja - kazao je direktor Gadžić, upoznavši posjetitelje s aktualnim stanjem u poslovanju Aluminija i s pozitivnim pomacima koji su se dogodili u protekla dva mjeseca, od sklapanja novoga ugovora za opskrbu električnom energijom, do započetog opsežnog postupka restrukturiranja Društva. Posjetitelji iz Katara, čije su ispostave, osim u njihovoj zemlji, smještene i u Saudijskoj Arabiji, Sudanu i u Libiji, jasno su iskazali ozbiljnost za ulaganja u prostor BiH, ističući kao značajnu poslovnu prednost činjenicu da, među svim zemljama Zaljeva, Bosna i Hercegovina jedino s Katarom nema obaveze plaćanja carinskih dadžbina u robnoj razmjeni.

Razgovori o mogućim projektima u koje bi se grupacija Hamdo mogla uključiti obuhvatili su i zamisao o izgradnji nove energane na naftni pogon za proizvodnju električne energije u Hercegovini, što se arapskim biznismenima učinilo itekako zanimljivim pa su zatražili i naknadnu dostavu više podataka o mogućnostima, tehničkim zahtjevima, opravdanosti i isplativosti toga projekta.

izvor: indikator.ba